

24. Oktober 2016

UKA 2016/106

Naalakkersuisut UKA 2017-imut Nunatta issittumiittutut inissisimanera nunarsuarmioqatigiinnilu inissisimanerput pillugu politikikkut periarffissarisai aallaavigalugit, Issittoq pillugu periusissiamik suliaqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Sara Olsvig, Inuit Ataqatigiit)

Inatsisartunut ilaasortat Sara Olsvig-ip Inatsisartut aalajangiiffigisassaattut siunnersuutaannut qujalluta ima Siumumiit oqaaseqassaagut.

Issittoq nunarsuarmioqatigiinnit ukkanneqarnera annertuvoq silaannaallu allangoriartornera nunarsuarmioqatigiinnut tamaginnut sunniuteqartoq pakkersimaarniarneqartorlu pillugu ukkanneqarneq milliartortussaani.

Nunarpassuit issittumut ilaanngitsut amerliartortut issittoq pillugu periusissiaqarput, silaannaap allangoriartornerani takussutissat uuttorneqarsinnaasut issittumi piummata. Soorlu aamma Naalakkersuisut akissuteqaataani tamanna oqaatigineqartoq: Nunat issittumiinngitsut tassaasut issittoq pillugu periusissiallit.

Maani nunami issittumi najugaqartuusugut, iliuutsivut siunnerfivullu taakkuupput periutsivut. Maani Inatsisartuni aaliangiinnerit tamarmik Nunatta issittumi politikianut tunngaviupput, tassaallutik Nunatta inuinit aaliangikkat, Nunatsinni issittumi najugaqartunit sinaakkusiussat siunnerfiillu. Taassumallu takutippaa immikkut ittumik periusissiorneq immi apeqquusernartoqartoq. Inooriaatsivut sumiiffinnilu assigiinngitsuni pinngortitaq sanileralugu allangoriartorneralu inooqataaffigalugu inuuvugut inuujuarsimallutalu. Naleqqussarnerit inooriaatsitsinnillu allanguisinnaassuseqarnitta napatittuarsimavaatigut imminillu taanna periusiuvoq inuup issittumi peroriartorlunilu inuusup kisimi ilisimasaa. Soorlu Naalakkersuisut akissuteqaatiminni tamannattaq naqissuseraat: "tassa issittoq issittumi inunnit najugaqartunit ilusilersorneqassaaq, taamaammallu issittumi ineriartornermi aallaavigineqassapput inuiaqatigiit issittumiittut inunnillu issittumi najugaqarlutillu sorlaqartunit siulersorneqassaaq".

Nunarpassuit allat issittoq pillugu periusissiallit issittumi najugaqanngillat, taamaakkaluortoq periussissiaat tamarmik nunatta inuunik peqateqarnani suliaapput. Taamaammatt issittoq pillugu naapeqatigiinnerit annersaat, Arctic Circle Conference, ukiumut ataasiarluni pisartoq Nunatsinnit soqutigineqarnerusariartoq isumaqarnarpoq. Issittoq pillugu suliaqarfinni oqallinnernilu amerlanerpaani uagut nammitsinnik akisussaaqataanerput tusartinneqartuartariaqarmat.

Siumumiit iluarisimaarparput Nunanut allanut Naalakkersuisup nunarput nunarsuup sinneranut pitsaasumik saqqumilaartittuarmagu, issittup ukkanneqarnera tassuunattaq pitsaasumik kiinnalerneqartarmat. Issittumi najugaqartugut maanilu sorlaqartugut ataatsimoorluta soqutigisaraarput soqutigisatta inooriaatsitalu naapertuilluartumik nunanit allanit paasineqarnissaa. Oqartoqarpat issittumi nipitunerusariaqartugut akerlianik oqarta nunat issittumiinngitsut aamma tusaanerusariaqartut. Issittumilu periusissanik suliaqarnermi nunap inui qulaatiinnarneqassanngitsut

soqutigisaatigullu tutineqassanngitsut kiisalu pingaarnertut allat uagut sinnerluta issittoq inuillu maani najugaqartut pillugit oqariartortuussanngimmata.

Taamaammat Naalakkersuisut akissuteqaatiminni oqariartuutigisaat paasilluarparput, tunngavilersuutigineqarmat Nunarput "Kunngeqarfiup" periusissiaannut ilaasariaqanngitsoq nunatta pingaartitai soqutigisaalu saqqumilaarnerusumik inissisimanissaat qulakkeerneqarsinnaanngippat.

Siunnersuuteqartup ujjartorpaattaaq nunanut allanut sillimaniarnermullu illersornissamullu politikkikkut aamma inissisimaffitsinnik periusissatsinnillu eqqartuisariaqartugut. Tassanissaaq Naalakkersuisut akissuteqaataanni oqariartuutigineqartut paasilluarparvut. Tassa nunanut allanut naalakkersuinikkut ingerlatsinerput pillugu nassuiaammut illersornissamut isumannaallisaanikkullu naalakkersuinikkut tunngasut ukiaanerani ataatsimiinnitsinni immikkut saqqummiuneqartussaammata.

Siumumiit taamak siunnersuuteqartumut oqaaseqarluta Naalakkersuisut siunnersuutigineqartup itigartitsissutigineqarnissaanut inassuteqarnerat ilalerparput.

Vivian Motzfeldt
Siumut)